



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 3

Donald Trump-i E Jean Carrol nem sen million \$83.3 agütsütsü

BJP-i AAP MLA tem sen crore 25 agi alizüktsü merang: Kejriwal



VOL. XXI NO. 105 (ADOK 105) DIMAPUR AMUNGNÜ (SUNDAY)

ANJETI (JANUARY) 28, 2024

₹ 5.00

NSF-i tatidang agütsütsüpur ajak moatsür

Dimapur, January 27, 2024 (TYO): Naga Students' Federation (NSF)-i Nagaland Board of Secondary Education (NBSE) High School Leaving Certificate (HSLC) aser Higher Secondary School Leaving Certificate (HSSLC) examinations agütsütsüpur ajak moatsügo.

"Kaketshirtemi tatidang atema kanga dang bendanga agüja aser meranga bushiba atema pelar

aser temulung ulushir tatidang agütsütsü ayongzük" ta NSF-i sangdong ka nung ashi.

NSF-isa Power Department dang tatidang mapang electricity supply shitak agütsütsü mepishia metetdaksügo.

Maneni, public-ia tatidang nung timtem magütsütsü mepishir ta NSF President Medovi Rhi aser Secretary Education Temjentoshi nati sangdong nung ashi.

Moreh nung Kuki-Zo nungeri lungkak ait

Moreh, January 27, 2024 (Agencies): Manipur nung Indo-Myanmar arrtsü anasa aliba Moreh jila nung Kuki-Zo nunger meyrjang aika adenshir lungkak aitba sentong ka ayonga agiogo.

Iba sentong ya Kuki Students' Organization, Moreh Block, Kuki Women Union aser Human Rights Moreh ajanga ayongzük aser Moreh Private Schools Association, Kuki Inpi Tengenupal o Hill Tribal Council Moreh ajanga yaritep.

Moreh nung high schools asem rongdoktsügo aser iba ya shisaliok rejutem samatsütsü merangba mapa ka lir. Iba inyakyim ajanga Moreh aser temeket nung aliba kaketshirtem tarutsü tia mejungi kümdaktsür. Külen Tengenupal district nungi Manipur police commandos agientsü mapang atsülanger ta Honibarnü lungkak aiterteri ashi.

"Onoki Moreh nung tensa süngjemdaksünür", "Modi onok

school lapokjang", "Union Home Minister ozü Memorandum atalokjang", "School lapokjang" ta parnoki yimym ayima lungkak ait,

Iba sentong nung KSO Moreh Block, Kuki Women Union and Human Rights Moreh aser Moreh Private Schools Association külemi sign asüba memorandum ka Deputy Commissioner Tengenupal ajanga Union Home Minister Amit Shah dangi yokogo.

"Moreh nung kaketshirtemi shisaliok mangur aser yaküm kaketshirtem ita pungu tashi dang school-i ao" ta Moreh Private Schools Association (MOPSA) Secretary Anthony Tongmang Mate-i ashi.

"Academic session 2024 mapang shitak nung tenzüktsü atema mi agi rongdoktsüba school ajak yanglujang. Ozü tanurtem school-i meypa odakjang" ta MOPSA General Secretary-isa ashi.

February ita Nagaland & Manipur nung Agniveers recruitment alitsü

Kohima, January 27, 2024 (Agencies): Indian Army-i Agnipath scheme kübok year 2024-25 atema Agniveers shimba maparen tenzüktsü.

February 2024 tetenzüklen nungi kibong makümer teburtemi Recruiting Year 2024-25 atema online applications agütsütsü akoktsü.

Nagaland aser Manipur kübok district ajak nungi applications meshir aser Agniveers shimokba mapa ya shilem ana lemsar agitsü ta PRO Defence Kohima-i metetdaksü.

Phase I nung centre ajak nung online computer based, Common Entrance Examination, (CEE) agitsü.

Phase II nung shortlisted candidates atema recruitment rally agitsü aser ibaji online Common Entrance Examination indang merit list nung alirtem asütsü.

Candidate temi

www.joinindianarmy.nic.in nung eligibility status reprangtsü aser personal profile yanglutsü akok. Iba mapa inyakba sülen website nung link ka ajanga SBI portal-i yoktsü.

SBI portal nung candidate temi bank charges den külemi Rs 250 agütsütsü. Iba ya Debit/Credit cards, online banking mesüra UPI ajanga agütsütsü akok.

Indian Army-i tongteprateptsü atema candidate tem active email aser mobile number alitsüla.

Candidate temi online application nung Aadhaar number agütsütsüla aser mobile number den Aadhaar sendakteptsüla.

Iba dak sendakba nung tanga osang ajak www.joinindianarmy.nic.in nung angutsü. Iba atema helpline numbers Army Recruitment Office, Rangapahar are 03862-249012; 8974958673, email: swarkokila@nic.in.

India-Myanmar arrtsü atsü dangtsü atema olemtep nungdaker

Dimapur, January 27, 2024 (TYO): Centre sorkari India-Myanmar arrtsü atsü dangtsü lemteba ya mapa küma meinyakdang tamasa olemtep tajung ka alitsü nungdaker ta Chief Minister Neiphiu Rio-i ashi.

"Nungdak süra asenoki iba tebilemtsü ya koktettsü atema formula ka renemtsüla aser ozüng alema aruba noktangtsüla, kechiyong Nagaland-i Myanmar den arrtsütepa alir aser anatsülen Naga nunger lir" ta pai ashi.

Naga nunger aika India tsütsü alir saka parnok alubo Myanmar nungang lir. Anungji formula tajung ka alitsüla, ta CM Rio-i ashi.

Taoba hopta Union Home Minister Amit Shah-i India-Myanmar arrtsü nung Free Movement Regime (FMR) agientsü aser arrtsü atsü dangtsü metetdaksügo.

Bangladesh den arrtsü kümzüka ayuba ama Myanmar dena arrtsü kümzüka ayutsü ta Amit Shah-i ashi.

Hombarnü Deputy CM Y Patton-ia Nagaland sorkari Myanmar den arrtsütepa aliba tanga northeastern state tem den sendentem amentsü aser iba sülen Centre den iba tebilemtsü lemsateptsü ta shiogo.

Centre-i FMR agientsü aser Myanmar arrtsü atsü dangtsü lemteba magizük kechiyong iba ajanga anatsülen aliba Naga nunger lemdangtsü ta Naga civil society organisations aser NSCN-IM ajanga metetdaksügo.

Meitei sorkar kübok lisopurtem alitsü makok: IITF

Guwahati, January 27, 2024 (Agencies): Manipur nung Indigenous Tribal Leaders' Forum (ITLF)-i Honibarnü 5 buba public consultant alidang Meitei sorkar nung lisopur MLA tem shilem magitetsü ta shiogo.

"Onok tepsetba Meitei sorkar aser Arambal Tenggol kübok tezüngzüktep agiba sorkar kübok

ozü MLA tem adentsü makok. Nübertemi aginüba ama parnoki inyaksüla. Parnoki nübertem tenüng nung Biren sorkar den toktepsüla. Nungdak dang süra parnoki MLA menden nungi anentsüla" ta IITLF-i metetdaksü.

Yimtenren tarutsü atema Mizoram sorkar den ajurutepa olemteptsüla ta IITLF-isa ashi.

"Onok tepsetertem aser ozü

tenla kitem aser kiojen raksatsüba sorkar kübok onok alitsü makok. Parnoki Arambal Tenggol kübok tezüngzüktep agiogo. Centre-i Delhi nungi indangidanga onok madak ketdangtsüla" ta parnokisa ashi.

ITLF-isa Free Movement Regime (FMR) agienba aser arrtsü atsü dangtsü aliba magizükba metetdaksügo.

Nagaland nakmati lendong atema police-i nisung 2 apu



Dimapur, January 27, 2024 (Agencies): Nagaland kübok Wokha district nung nakmati atudak mi adoka nisung rongsetba lendong dak sendakba nung Nagaland police-i nisung ana puogo.

Iba lendong ya Ruchanyan yimtsüng nung nakmati atudak ka nung atalok aser nisung 6 rongsetba den pezü kanga mejungi yirua lir.

Tasür aser yirur ajak ya Assam nungi lir aser teyirurtem ajak Dimapur nung mozü ki ka nung anepaludar.

Nagaland police-i apurtem ya nakmati atudak kiburtem lir ta osang angazük.

"Bhandari police-i nakmatu atudak kiburtem- Moyithung Tunge aser Tsenchamo Mozhui

na puogo. Iba ken o nung tai tonglokja lir nisung ana Azgur Ali aser Saiful Ali na jenshir. Tenaprong Assam kübok Golaghat district nung Uriamghat nungi lir" ta Additional Superintendent of Police K. Soriso-i ashi.

"Tenem kolak ka nung parnoki ozüng alema nakmati atu" ta Soriso-isa ashi.

Tasür ajakji Uriamghat town kübok Sonapur nungi liasü. Parnokji Majibul Ali (46), Kamal Bahadur Chetri (47), Dol Bahadur Chetri (44), Bishal Thapa (28) aser Kharka Bahadur Chetri (60) nunger ta jangjaogo.

Külen, yirua alirtem ya Santosh Chetri (23), Ramesh Chetri (36), Bhupen Rajbangshi (34) aser Loknath Chetri (27)

nunger lir aser parnok Dimapur nung private hospital ka nung anepaludar, ta Soriso-isa metetdaksü.

Wokha District Administration-i iba lendong nung takoksa angur shia nem Rs 1 lakh teyari agütsütsü osang metetdaksügo.

"Golaghat district nung Assam-Nagaland arrtsü anasa aliba Devipur, Sonapur aser Dayalpur yimtsüngtem nungi nakmati atur nisung 6 asü" ta Assam minister Jayanta Mallabaruah-i metetdaksü.

"Nagaland kübok Wokha district nung iba lendong ya Yashi atalok. Tanü ni tasür kibongtem den ajurutepogo aser onok akokba tashi yaritsü nangzükogo" ta Minister Jayanta-isa ashi.

NEA tir inyaktsü Dr. Bweyhunle shimogo



Kohima, Aenjeti/January 27 (TYO): Nagaland Education Association (NEA) ketdangpur tasen shima alirtem nem mapa amoktsütsü asoshi sentong ka January 27, 2024 nü Directorate of School Education, Kohima nung ayongzüka liasü.

Tir menden nungi alusang Dr. Zavise Rume-i sentong nung o

tatsüka jembidang züngsemtem aser state indang Education Department ketdangsür temi yaritepba asoshi pelaba lemsatepa liasü.

Tir tasenba Dr. Bweyhunle Khing, Principal, Government College Wokha ajanga jembidang züngsem ajak dang amalitep akatsü aser shilem

tajung agitsü ayongzüka liasü.

Unity College of Teacher Education, Dimapur indang principal Dr. Akala-ia iba sentong nung o tatsüka jembidang Nagaland nung education tajungba kumdaktsütsü asoshi Association nung shilem tajung agitsü ayongzüka liasü.

Nagaland aser Manipur atema Indian Army recruitment alitsü

Kohima, Aenjeti/January 27 (TYO): Agnipath Scheme kübok 2024-25 küm asoshi Agniveers shimtsü atema kibong makum aliba teburtem dang nungi Indian Army ajanga online application meshitsü.

Recruiting Year 2024-25 atema online registration ya 2024 February ita mezüng hopta nungi tenzüksü. Applications ya Nagaland aser Manipur nung aliba district ajunga nung alirtem indang agizüktsü. Agniveers recruitment ya phases ana nung shimtsü.

Phase I ya Online Computer Based, Common Entrance Examination (CEE) alitsü aser state kübok teshimtet centre tem nung agitsü.

Phase II Recruitment Rally ya shimteta aliba candidates tem atema alitsü, shirnok Online Common Entrance Examination nung shimer merit list tem asoshi alitsü.

Candidates temi pei temsüa aliba metettsü asoshi www.joinindianarmy.nic.in nung log in asütsü aser personal profile ka yanglutsüla.

Application takok ngua fill up süteter candidate tem dang website nung aliba link ka ajanga SBI portal dangi yoktsü. SBI portal nung candidate shia sen 250 den bank taa agütsütsüla.

Iba sen ya Debit/Credit cards, online banking mesüra UPI ajanga agütsütettsü.

Candidate tem email aser mobile number shidak alitsüla aser tarutsü nung osangtsüsang agitepba mapang Indian Army-i itemji amshitsü.

Exam centre atema candidate temi tesem pongu shimtsüla. Candidate temi online application nung Aadhaar number inoktsüla aser Aadhaar ya mobile number den sendakteptsüla.

Candidate nem Online CEE practice atema pei category nung link ka Join Indian Army indang website nung agütsütsü.

Shidakba CEE tatidang magütsüdang candidate temi khenbo inyakhitsü ajungshir.

"How to Register" aser "How to Appear for online CEE" indang animated video tem www.joinindianarmy.nic.in nung angutsü.

Educational qualification, physical/medical standards aser job specification indang osang www.joinindianarmy.nic.in nung angutsü. Candidate temi online registration atema category ka dang shimtsüla. Army Recruitment Office, Rangapahar indang helpline number 03862-249012; 8974958673, email :swarkokila@nic.in alitsü.

Candidate temi www.joinindianarmy.nic.in ajanga mangatetba asüngdangyatsü akok.

Nagaland Angh-i Bishu salem lemsatep

Kohima, Aenjeti/January 27 (TYO): Kachari nunger adianu aser adianutsürtem den Bishu benjong salem lemsateper, ta Nagaland Angh La Ganesan-i sangdong ka ajanga ashi.

Bishu benjong ya alu ruzüker amungba aser Tsüngrem nem tenüngsang

agütsüba benjong ka lir.

Iba bejong ajanga sobaliba tajung, tsüngsang, ken aser kelem-keja sayur.

Iba benjong ajanga nüburtem rongnung telungjem aser tangatetep tali lidakjangma. Sobaliba benjong wazüka ayuba aser temaba

jenjangi ajungketba nung arok külemi inyakba ajanga tashi itshir aser tarutsü putu asoshi tajangzüik asütsü ta asenoki angatetti.

Nisung ajak tepela, anema lia aser tesunep nung benjong amungtsü moatsür, ta Nagaland Angh-isa ashi.



Rangers Club Kohima ajanga January 26, 2024 nü 'Clean for beauty Kisama' omen kübok Naga Heritage Village, Kisama nung mürekmeju mapa inyaka liasü. Kisama semdangertem dang Kisama Village müreka ayutsü ajungmesoa iba mapa ya inyaka liasü.

MOLUNGNEN O



Onoki teti meima aliba Obala asür **Mr. Mar Walling**, Tsüngremi agütsüba arishi tembanger 21st January 2024 anogo nung teti anisüngzükdaki ogo. Pa shirangba nungi asü pila anogo tashi nung kija, kibong, Arogo aser lokti balala shirnokisa sarasadem den rongsen nubo aser lemgang balala nungi kwikati yaritepogo ajak dang kanga pelaba metetdaksür.

- Temeim kinungtsü, chirnur, kinunger aser anükapang.

Dimapur Ao Lanur Telungjem ajanga tenüngsang agütsür

Dimapur, Aenjeti/January 27 (TYO): Director General of Police (DGP) Nagaland, Rupin Sharma IPS-i kangadang langa aliba Presidents' Medal for Distinguished Service sempet tulu 75th Republic Day nung ngutetba atema tenüngsang agütsür, ta Dimapur Ao Lanur Telungjem (DALT) sangdong ka ajanga ashi.

"People's DPG" ajanga dangar dak nungi alakteta bendanga agütsür tenzükbka ajanga region nung tensa tajungba kumdaktsüba kisüng nung ozüng amshirtem jenjang tajungba kumdaktsüba den Nagaland nung temesepba mozü achi-ajemer, shibelena ayoker

asür tashiyim amshia rakzükraktermer azüoker, ta sangdong ajanga ashi.

Iba konang tetushi ya nai tanen makai meranga inyakba aser Nagaland nung law and order shidak amshiba temaitsü lir.

Nai züngzüng ozüng shidak amshia Nagaland nung alirtem nem tensa tajungba bener arutsüba nung onoki maneni na nungita yaritsü, ta DALT sangdong ajanga ashi.

Maneni Medozhalie Pienyu, Deputy Commandant General, Home Guards and Civil Defence ajanga President's Medal for distinguished service sempet anguba atema tenüngsang agütsür, ta sangdong ajangasa ashi.

Dimapur Red Cross-i St. Joseph Orphanage semdang



Dimapur, Aenjeti/January 27 (TYO): Republic Day anogomung atema Dimapur District Administration ajanga shisa agütsüba ama Dimapur Red Cross Managing Committee züngsem temi January 27, 2024 nü Veterinary Colony, Dimapur nung aliba St. Joseph Orphanage semdanga liasü.

Iba sentong nung Vice-Chairman Ajay Sethi, Honorary Secretary Kamala Kant Paul, Treasurer Ashok Agarwal & MC Member Ajit Sethi nunger temi o jembi aser iba orphanage indang caretaker Elizabeth Yimchunger-i yangji aliba tanur 32 den metetpela mapang agia liasü.

Congress züngsem nungi Bobby Panicker atsüngtsür

Dimapur, Aenjeti/January 27 (TYO): DAC Report nung shia aliba ama aser INC Constitution and Rules indang Disciplinary Rules of Rule 6 (b) kübok tashi agüja aliba ama January 27, 2024 nü NPCC Executive Committee ajungben

rondak senden ka amenba nung Bobby Panicker ya tang nungi tenzüka Congress züngsem nungi küm trok asoshi atsüngtsütsü telemtetba agi, ta NPCC tir S Supongmeren Jamir ajanga sangdong ka nung ashi.



January 27, 2024 nü New Delhi nung linük tatong Tir Jagdeep Dhankhar aser Minister of State for Sport, Nisith Pramanik nati Republic Day Parade 2024 nung shilem agir National Service Scheme (NSS) züngsemtem den tangokba noksa nung angur.

Congress-i ajak longjemdaksütsü meranger: Mallikarjun Kharge

New Delhi, Aenjeti/January 27 (Agencies): Lok Sabha election agitsü mapang ana nung lia tang Bihar nung yimtenren tsütsü temelenshi adokba mapang ka nung Honibarnü Congress Tir, Mallikarjun Kharge-i, opposition INDIA teloktep nung mangatetep madoktsü atema Congress-i akokba tashi meranga inyakdar, ta metetdaksü.

Bengaluru nung osangbenertem den jembidang Kharge-i, "Janata Dal (United)-i teloktep (INDIA) toktsütsü, ta asüba osangji nibo memetet," ta ashi.

JD(U) lenir, Nitish Kumar-i tanü Bihar Chief Minister menden nungi anentsü aser

Congress MLA tem aikati pa den adentsü ta asüba osangbo ni angashiogo, ta pai ashi.

"Ni Nitish Kumar dangi shidi ka züluogo aser pa den-a jembitsü merangogo. Ajisüaka Nitish tebilembaji ni memetet. Asüng (Amongnü) ni Delhi-i aotsü aser osang ajakji metetpelatsü. Kechi atalokdir repranga dang atadi," ta pai metetdaksü.

Opposition teloktep nung mangatetep adokba dak sendakba nung Kharge-i, Congress-i INDIA teloktep nung alir ajak longjemdaksütsü atema inyaker, ta ashi.

Kharge-isa, pai Trinamool Congress tongti lenir Mamata Banerjee aser CPI(M) general secretary Sitaram Yechury na

den-a jembio, ta ashi.

"Ni tena dang (Mamata Banerjee aser Sitaram Yechury), asenok longjema alitsüla; yamaji asü nungang asenoki (taruba Lok Sabha elections nung) tokteptetsü ta shiogo," ta Kharge-i ashi.

Tesüiba anogo ishika tsünga INDIA teloktep nung petsaperong adoka arudar; regional party balala nungi lenirtemi menden lemsaba tsütsü Congress-i tamakok anguba atema jembidar.

West Bengal Chief Minister, Mamata Banerjee aser Delhi Chief Minister Arvind Kejriwal natia pepei state nung tanga party den meloktepi tokteptsü, ta sangdongogo.

BJP-i AAP MLA tem sen crore 25 agi alizüktsü merang: Kejriwal

New Delhi, January 27 (Agencies): Honibarnü Aam Aadmi Party (AAP)-i, BJP-i Delhi nung AAP MLA tenet mesüzüktsü merangogo; BJP-i MLA shia dang sen crore metsür pongungu (25) agütsüdi AAP tokjang, ta shia mesüzüktsü merang, ta tai tongloktsü.

Ajisüaka Delhi BJP-ibo iba osangji tai ta ashiba den külemi AAP dang MLA temji shirnokar metetdakjang aser shirnoki MLA temji ajuruar metetdakjang, ta ashi.

Delhi Chief Minister Arvind Kejriwal-i 'X' ajanga, parnoki party MLA tenet den tongtepratepogo aser kobi melii

AAP tongti lenir aputsü ta shiogo, ta metetdaksü.

Kejriwal-isa, parnoki AAP MLA 21 den tongtepratepdar ta shiogo, ta metetdaksü.

AAP MLA shia sen crore 25 agi mesüktsü merang aser Delhi sorkar atsüngdokba sülen election nung tokteptsü atema parnok nem BJP ticket agütsütsü, ta shia mesüzüktsü merang; ajisüaka AAP MLA tenetpronglai magizük, ta AAP tongti lenirisa tai tongloktsü.

Kejriwal-i, Delhi nung AAP sorkar atsüngdoktsü atema Delhi excise policy ochimashi ken o dak sendakba nung pa aputsü meranger, ta ashi.

"Tesüiba küm 9 tsünga Delhi nung AAP sorkar atsüngdoktsü atema asalentong aika yanglua inyakogo saka item ajakji tamakok angu," ta pai ashi.

Osangbenertem senden ka nung Delhi minister, Atishi-ia, BJP-i Delhi nung AAP sorkar atsüngdoktsü atema 'Operation Lotus 2.0' tenzükogo, ta ashi.

Laisa, "Yaküm parnoki AAP MLA tem sen agi mesüzüktsü merang saka makok," ta ashi.

Iba dak sendakba nung Delhi BJP secretary, Harish Khurana-i Atishi dang MLA tem tenüngji sangdongang aser parnok ajururtem tenüngji-a sangdongang, ta takhangba agütsü

UP nung PM Modi-i sen crore 19,100 indang projects semzüktsü

Lucknow, January 27 (Agencies): Lok Sabha election agitsü mapang ana nung lia Honibarnü Ato kilonser, Narendra Modi-i Uttar Pradesh nung terenlok project aika semzüktsüogo.

Bulandshahr nung sen crore 19,100 indang terenlok projects semzüktsüba aser project tasen tenzüktsüba sülen lokti den jembidang Modi-i, "Schemes balala ajanga tajanzük angutsüpurtem ket shidak atongtsüsa kodang sorkari inyakdir ibaji ajanga ochimashi samatsür. Iba ya chichiba secularism, iba ya chichiba loktiliba nung temeden lir," ta ashi.

Pai nüburtem ochishia tenzükter, ta shia Modi-i, "Ni aniba sorkar kübok nisung crore 25 kanga sensak tia nungi anitetogo, aser ibaji ajanga tang anünga aliba sensakertema kobi melii sensak tia nungi anitettsü atema parnok nem teimla agütsür," ta ashi.

"Nenok ya kü kibong, nenok mangdangji kü nükjidong, ibayongji nenok ama kibongtem tashi itdaksütsüji kü mapa asütsü," ta pai ashi.

Paisa, sorkar schemes ajanga senso ajak tajanzük angutsü, ta metetdaksü.

Modi-i, sorkari sangdongbatemji mapa küma inyaker aser scheme balala ajanga tajanzük angutsüpurtem ket shidak atongtsü atema inyaker, ta ashi.

Tawa Ayodhya nung Ram

tekülem ki semzükba dak sendakba nung Modi-i, linük naroküm temaba jenjangi ajungkettsütsü, ta ashi.

Linük nüchiso anguba sülen terenlok tsütsü tesem aika sendoka liasü, talisa Uttar Pradesh sendoka liasü, ajisüaka tang Centre aser state naprongla nung BJP sorkar aliba ajanga state kanga renlokogo; Uttar Pradesh nung terenlok makaibo India tashi maittsü, ta pai ashi.

Paisa, anüolen tsütsü Uttar Pradesh ya mapa agütsüba tongtibang tesem ka kümdar aser Greater Noida densema yimti pezü world-class industrial smart cities akümtsü atema terenlok mapa inyakdar, ta metetdaksü.

Aluyimertem tebilemstü onük dak sendakba nung Modi-i, aluyimertem tebilemstü onük atema sorkari nendaka inyaker aser parnok kibongtem kümzüktsü atema sorkari inyaker, ta ashi.

Iba sentong nung Modi-i gari lenmang terenlok project aika tenzüktsü, Mathura-Palwal section sendaktepba lenmang semzüktsü, Indian Oil indang Tundla-Gawaria pipeline semzüktsü aser Integrated Industrial Township at Greater Noida (IITGN) semzüktsü.

Iba sentong nung Uttar Pradesh Chief Minister, Yogi Adityanath-i Modi nem Ram kürakyanglu ka sempet agüja liasü.



January 27, 2024 nü New Delhi nung linük tatong Tir Jagdeep Dhankhar aser Minister of State for Sport, Nisith Pramanik nati Republic Day Parade 2024 nung shilem agir National Service Scheme (NSS) züngsemtem den tangokba noksa nung angur.

Houthis teloki British Oil Tanker ka amak; India nunger 22 liasü

New Delhi, January 27 (Agencies): Iran-i pusemba Yemen nunger Houthi telungpurtemi January 26 nü missile amshia British oil tanker- Marlin Luanda amak; iba rong nungji India nunger 22 den Bangladesh nunger ka densema liasü.

January 26 nü teyari meshiba sülen Indian Navy-i parnok indang guided missile destroyer, INS Visakhapatnam, Gulf of Aden-i yokogo.

Indian Navy-i sangdong ka ajanga, "NBCD team den INS Visakhapatnam nung aliba osettem amshia Marlin Luanda rong nung mi enseptsü merangba den külemi rong nung alirtem den yaritepdar," ta metetdaksü.

Honibarnü Indian Navy-i, Marlin Luanda rong nungji India nunger 22 aser Bangladesh nunger ka liasü, ta metetdaksü.


Yaküm November ita nungi tenzükba Houthi telungpurtemi oil tankers amaker. Israel-i Palestine nunger amakba agi parnoki oil tankers amaker, ta shiogo.

Osang angazükba agi, British oil tanker ji shishilembaba company Trafigura atema amshir. Company kibur jagia Red Sea nung missile amshia Marlin Luanda amakba osang metetdaksü.

British oil tanker denji külemi US indang raradang amshiba rong destroyer USS Carney-a amak.

Yaküm December 24 nüa Houthi telungpurtemi drone ka amshia oil tanker ka amak; iba oil tanker nungji India nunger 25 liasü.

Gulf of Aden nung oil tanker amakba sülen UK sorkari, UK aser pusemertem mangyangtsü atema temeden lir, ta metetdaksüogo.



January 27, 2024 nü New Delhi nung aliba Congress headquarters nung Congress lenir Jairam Ramesh aser Ajay Maken na den tangartem party campaign tasen ka tenzüktsü dang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, JANUARY (AENJETI) 28, 2024

Tsüngrem tsütsü

Asen lima kanga majung asütsüa akok, asen loktiliba temenen agi sünga alitsü akok, asen nübortem ochimashi aser nükta pangta temenentem nem moksepdaktsür alitsüa akok, asenok libaliro ajak Tsüngrem tsüngdang tesempatsü mapatem agi sünga alitsüa akok, saka kecha masü, na dang indangindanga lira Tsüngremibo na maitsü, kechiyong pai na ajungbaji jungjunga ajiokteter. Noah mapang alima temenen agi sünga liasü. Pa dak alaka nisung shingaia Tsüngremi aginütsüsa meinyak. Tsüngrem külemtsü melena nisung ajaki süngyanglu külem aser pei nük dang ajungba apia mapa tamajungtem ajak inyak. Tsüngrem dak amanger shinga mali, iba ama alima japujari aser ambangyim agi sünga aliba tensa mapang ka nunga pa kija süaka, Noah-ibo Tsüngrem den indangindanga jaja. Iba ama temenen mapa agi sünger litepba loktiliba nung Noah-er jabasotemia temenen mapa inyakyonga taittsür malitsüba tensa aser lokti ka nung parnok liasü. Ajisüaka, iba ama temenen mapa agi asüngba lima ka nung, Noah-er jabaso asütsübaji alima nung alir ajak dang nungi tia takaba liasü. Kodang Tsüngremi ashiba angaa Noah-i rong yanglutsü asoshi par jabasotem aja, parnokitebui ashiba angaa küm noklang ka par medemertem aoleni mao, par medemertem kazüdak mekazü, par medemertem achiajembra chia majem, anogo shia tebu den dang rongji yanglua among. Ashiko, Noah-i ali takong nung küm noklang junga rong yanglutsü asoshi ajadang, par jabasotem dang par medemer aser külem lisemertemi tebuji yiar, anungji pai ashibaji mangatsü atema o tapu aika agi mesüzüka alitsü akok, saka Noah-er chirtemi tebu o medoktsü. Tebuji yiar masü saka Tsüngremi ashiba inyaker ta Shem, Ham aser Japheth nungertemi angateta liasü. Iba ama temenen mapa agi sünger, shingaia Tsüngrem lir ta maliba lima ka nung, pei chirtemi tashi angatsüsa sayutetba aser angatetdaksüba Noah ama tebu kaji koda tenükshitsüka lir. Nisung ajaki Tsüngrem doktsü saka Noah-i Tsüngrem medoktsü. Iba ama mapang, Noah libaliro ajanga par chirtemi tashi angaa pa den Tsüngremi tenyaba mapa inyakbaji koda jangratemtsü. Tangartembo pei inyaknütsü inyaka jangratema litep, saka Noah-i itemji jangratema mebilem. Paibo Tsüngremi mulungba mapa inyakba nung dang jangratema bilem. Aji oda, Noah tamang aser tashi angaba ajanga Tsüngremi pa dang masü par kibong ajak kümzük. Naoh-i indangindanga aliba ajanga par kibong kümzükba ama, tanüa asenoki Tsüngremi ashiba angaa aliba ajanga asen dang masü saka asen kinünger, asen medemer, asen kiyonger aser asen yimtsür-yimertem kümzüksü akok. Mapa tamajungi nisung tamajung kümdakja anisaba ama, mapa tajungia nisungtem tajungleni anir. Aji oda, asen taküm azüoka aliba ajanga, asenoki mapa tajung tilaka inyakba ajanga aser aseni ken aremzükba ajanga asen den külemi alir mesüra külemi inyaker takümtem kümzüksü koka lir. Tangar ajaki achir, ajaki ajemer, ajaki inyaker aser ajak ilen jagi aor, anungji kechi balaka ta bilema asenoka telok tuluba den külemi aodang, memeteti asen taküm dang masü saka asen kibong aser asen lokti ajak samatsüsa anogo ka ajurutsü. Noahi alimai lendong arutsü meteta mali asü, saka pai Tsüngremi ashiba angaa ali, anungji meimlaika alidang, kenü Tsüngremi pa aja aser ashi, " Na aser nür kibong ajak rong jagi atung, kechiyong iba (temenen) putu nung na kü tsüngdang temeshi nisung lir." Lipok 7:1. Tanüa asenok alima tzü mopong kanga tsüka kümadoker menoknok, yipru, tzümetsüng aser alima tashidak tapu aika agi amokmerenba mapang ka nung ya, Tsüngremi Noah dang ashi ama, asenok danga ashitsüsa asen taküm Tsüngrem tsütsü alitsübaji kanga tongtibang kümogo.

OLEMSABANG

Tasembuba Tenlaki Asoshi Sapisayangteper

- O. Tongpang Jamir, CTN.

(Yashi adok nungi...)

Anüdoklentip Israel chubayimliji Assyria nunger kübok 722 BC nung ai. Iba sülen anüolentip Judah chubayimliji Babylon nungertemi 586 BC nung maktetadok. Ibaji ajanga mezüngbuba tenlakiji raksadok aser Judahites jenti Babylon limai jenaoadok. Babylon chubayimliji Persia nunger dak laoadoker külen, Cyrus tulusangi Jewish nübortem jenaoadoker ajak pei limai shilangtsü mela aser parnok tenlaki tanaben yanglushi. Ibajagi tanabuba tenlakiji (Second Temple) Jerusalem nungjisa yanglu.

Küm noklangzüng mezüngbuba AD nung Christianity iba lima nung nungtugu aküm, aser Nazareth nunger Yisuji Khistan tamangba yimsü nung nükmen küma ali aser yangji sayutsüngi. Iba sülen, Rome nungertemi 70 AD nung Jewish-Roman rara mapang iba tenlaki raksatsü. 1920's aser 1930's mapang Europe lima Jewish nübortem jenti tepsetba ajanga Palestine limai aika jena aoba mopungsem ka aon, koba dang Aliyah ta ajar. Aser ibai ajanga Palestine lima likalilem nung temelenshi tera adok aser Arab nübortem den mepetmesü adoktsüsa aküm. Zionist Movement alizüng ajanga akaasodaktsür külen parnokite Arab nunger dang ali alizük aser aluyimba mapatem tenzük koba dang Kibbutzim aser Moshavim ta ajar. Iba arua lipoka aliba nükjidongji Jewish nübortemji peisasa litettsüba aser yimsoshiba nung tongtibang shilem agi. Ajioda, Jewish nübortem arua lia renloka aoba ajanga Arab lima nütüngtem kanga tatayua kümdaktsü aser lenirtemi Jewish nübortem arua aliba jagi parnok sobaliba aser likalilem senmang samaa aotsü ta shisatet. Adangjila, iba sülen tanemtanemi Jewish aser Arab nübortem tsüngda mangatetep alir aser mapang shia rara adoka tokolak menüteper.

United Nations General Assembly bangzüng November 29, 1947 nung Israel aser Palestine sadangtsü lemtet nung ajemdaker May 14, 1948 nung David Ben-Gurion, Jewish Agency nung tokolakba aser tarutsü Israel Ato Kelonseri Israel nunger Independence sangdong. Ibai ajanga Jewish nübortem Holucaust mapang nisung jenti tepsetba nungi tangu sadokba mapang tenji. Palestine lima agi Jewish aser Arab kin lemsar küm 76 lir külen tang Israel nung atalokba yagi tamangba yimsü balala nung alirtem kanga aoksadaktsüdag.

Judaism asoshi Jerusalem limaji temeshitiba tesem ta tetshir. Kechiyong parnok lipok otsü nung Tsüngremi alima nung alitsü shimtetbaji Jesrusalem nung tenzük ta amanger. Ajioda, Jerusalem nung tang akaba Temple Mount ya parnok asoshi Solomon Chubai mezüng yangluba tsükchiri raksatsü aser tanaben yangluba ano Jewish-Roman rara nung raksatsüba tesem to ibaisa ta parnokite metet. Jerusalem nung Yisu kangki nung angenloker shia aruba tesem asübayong, Christianity asoshia Jerusalem lima ya temeshi lima aser tongtibangtiba tesem ka ta tetshir, ibajagi alima ajunga nung raliwalir Christian-tem million jenti küm shia yagi arur. Islam-purtem asoshia Mecca aser Medina sülenbo Jerusalem ya tasembuba temeshitiba yimti ta tetshir. Kechiyong par tsüngrem Muhammad-jia iba yimti den jungjunga sentaktepa lir ta parnokite ashir. Muhammad-i Mecca nungi Jerusalem tashi amang aenlenmang nung aru (koba dang Isra and Mi'rai ta ajar). Iba sülen Al-Aqsa Mosque, koba tang Temple Mount lir yang nungi kotaki atu ta parnokite amanger.

Anungji Israel nungeri tang Jerusalem nung tenlaki tasembuba asoshi asameyangtepba yagi tatembang mapang kati arur asü ta alima ajaki shisadangdar. Parnok alizüng atongtsü asoshi Israel Jews nübortem lungjemogo. Parnok tetsütebou tekülemba tesem, koba dang ano Solomon Tenlaki taa ajar, iba tenlaki nung Putirtemi sanchanu aser posü amala tarungba tenla agüja aru. Temeshi rongnung Temeshitiba tesem, "Kodesh Hakodashim" ta Hebrew oshi agi ajar, ibai telungtiba temeshi tenladak liasü. Iba telungtiba jagi aitsübaji Temaba Putiri "Day of Atonement/Yom Kippur" nungdang aitsü koka liasü. Ajiasünung, ibaji songjena pei meyong küma yanglutsü sapisayangtepdagi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'Na Koda Tulu' osangtajung ken küm 75 jungogo



Osangtajung ken 'Na koda tulu' küm 75 ajungba nüngtem nung tekong tasen ka bendenloka record asüba mapang tangokba noksa nung angur.

January 27, 2024: Khristantemi tekülem sentong nung kanga sapua atenba osangtajung ken 'Na koda tulu' küm 75 jungogo, aser iba nüngtem nung Matt Redman aser Mitch Wong nati iba ken nung ano tekong tasen ka (tekong pongububa) mejema bendenlokogo.

1885 küm Sweden nung yipru mopung tesashi ka ajanga ajungmesoa züluba sangro/ken "Na koda tulu" ya alima tesem ajaklen Khristantemi tekülem sentong nung tena arudar.

Iba osangtajung ken ya Europe nungi lir saka 1949 küm mezüing America nung saya. 1957 küm June 16 nü iba ken television nung sayaba sülen iba ken kanga nüngtugu aküm.

Kentener George Beverly Shea-i mezüing Billy Graham indang New York Crusade nung iba ken tena liasü aser iba sentong nungji nisung 19,000 shi liasü.

Interview ka nung jembidang Shae-i, iba ken angartemi crusades piyong nung iba ken atentsü atema 100 jungnüa ben mepishia liasü, ta

metetdaksü.

Iba ken ajanga Protestant Arogo kanga kongshia liasü aser tanüa iba ken küm 75 ajungba mapang nung denomination balala nungi Khristantem tanurtain aikati iba ken kanga sapua atener.

Iba ken küm 75 ajungba nüngtem nung Integrity Music-i osangtajung ken zülur nüngtugu ana- Matt Redman aser Mitch Wong na dang tekong pongububa zülutsü asüingdanga liasü.

Tena den osangtajung kentenertem- Chris Tomlin, Matt Maher, Kari Jobe, Cody Carnes aser Naomi Raine nungeri longjemer tekong pongububa densema iba ken record süogo.

'O Store Gud' (O Tulusang Tsüngrem) ya Sweden nunger sangro zülur aser sayutsüingir, Carl Boberg-i 1885 küm zülua liasü. 1885 küm Boberg Tenla kidang nungi kidangi meyipa aoba mapang nung yipru mopung tesashi ajangshiba ajanga pa ajungmesoa pai iba ken ya zülü. Tesülen British nunger missionary Stuart Hine-i iba ken ya Russia oshi nung

angashiba sülen pai English oshi agi meyip aser World War II mapang Ukraine nunger refugees den lemsatepa liasü.

Iba ken küm 75 ajungba nüngtem nung Redman aser pai aniba team-i 'Na Koda Tulu' ken nung tekong pongububa zülüogo.

Tekong pongububaji yamai lir:

*'Until that day, When heaven bids us welcome,
And as we walk this broken warring world,
Your kingdom come, Deliver us from evil,
And we'll proclaim our God how great You are!'*

Tekong pongububa ya Los Angeles nung aliba Gold Pacific Studios aser Nashville nung aliba RCA Studio B nung record asü. Nüngtugu kentener Elvis Presley-ia RCA Studio B nung 'Na Koda Tulu' ken record süa liasü aser iba version ji ajanga Grammy Award angu.

Tekong pongububa keta yangluba kenji January 26, 2024 nü sayaogo aser iba nungjagi ajangzüktetba sen ajanga Ukraine nung timtemertem yaritsü.

ANO GO ABEN TSÜNGREM DEN

SHITAKBA TEMULUNG MEYIPTSÜ AJABA

Aser nenok süoshi masü nenok mulungjang shisaang, aser Kibuba nenok Tsüngrem dangi meyipang.... aser tamajung nungi pai atsüanem akar. Yoel 2:13

Teyanglur Tsüngremi maginüba aser pa madang magizüktetbaji telunglen temulungjang memerük yur tema tereprangtsü merüka tobur junga sayuba ya lir. Tejen putu Israel chirtem tenung agi Tsüngrem teshimtet kin ta jaa bilema liaka, par mulungjang taküm yimya inyaksangshi ajak Tsüngrem nungi talangka pilaa or pi mamanger den saku liasü. Anungji tsükchir lendong, warashira tia tamajung ajak agi parnok meketpang, akialu metsümenaba ajak nung azükaru temoatsü soitatoker liasü. Anungji Yoel ainkar ajanga par anemsü tamang, tema tobur ajung nungi shitakba temulung meyipa Tsüngrem dangi arung ta sangoktsü.

Tanü asen Ao kin, tamang yimsü lenir mezüingpur. Tamang agizüker amanga aruba joko küm 150 tema jajar, saka asen tamang jenjang tereprangtsü nungbo tangar tsüngdang tobur tajung, tain saka telunglen temulungjangbo Tsüngrem den talangka pilaadokba kin. Anungji temeshi Tsüngrem mepelaba tanü asen nübur madak lir, yamaji temoatsü aika nungi asenok pilaa lir.

Amangbapurtem, tanü asenok tamanger taküm aser kibong shiai kanga aroka shisadanga temulungjang telungtiba nungi Tsüngrem mebushira iba yimya tamang yagi Tsüngremer terasaba temerenshi nungi asenok mejenbutsü.

T. Ken 51:6, "Nai temulung telungtiba nung ochiaginür aser temiimdak nai kü dang shisatsü sayur."

Amen

Haiti nung prangpong amer telok kati apuba nun 6 chiokogo

January 27, 2024: Taoba nung yimjung atema ni Hokolbarnü Haiti yimtiba, Port-au-Prince nung prangpong amer telok kati apuba nun trok chiokogo; Congregation of Saint Anne nungi nun trok den tangar ana Bodhbarnü chiokogo, ta osang ka ajanga metetdaksü.

Haiti Bishops Conference nung Tir, Archbishop Max Leroy Mésidor-i sangdong ka ajanga, "Onoki Tsüngrem nem tenüngsang agütsür aser nenoki nungita yariba atema pelar," ta metetdaksü.

Prangpong amer telok jagi parnok chiochtsü atema sen million 3.5 takhangba agüja liasü, ajisüaka parnoki akhangba ama senji agütsür asü magütsüar mejangja.

Anogo pezü tejaklen Pope Francis-i nun tem chiochtsü atema takhangba agüja liasü aser nun tem adenba Arogoia parnok atema sarasademtsüba anogo nung parnok chiok.

Pope Francis-i, "Haiti nung nun trok densema telok ka puer aoba osang ni angazükogo. Parnok chiochtsü atema ni mepishiba den külemi iba linük

sarasademtsür. Iba dak alia ni ajak dang rara anentsü mepishir, kechiyong iba linük nung rara ajanga nütsüing aika kanga timtemdar," ta metetdakja liasü.

Aid to the Church in Need (ACN) den jembidang Port-au-Prince nung aliba Arogo-i, "Saint Anne nungi sisters aser Haitian Conference of Religious den külemi Port-au-Prince-ia sister trok den tangartem chiokba atema Kibuba dang pelar. Iba ama tatalokba ajanga maneni asen tamang tendangogo saka asen tamang manokshir," ta metetdaksü.

"Tsüngremi mapang ajak nung sensakertemi ayimdenba angar. Onoki Pa dang ayimden, tatidang mapang nung Pai tashi itdaksü aser talenba salatsü," ta Arogoisa metetdaksü.

Yaküm August ita nunga Christian education ministry- El Roi Haiti tentetsang kinüngtsü, Alix Dorsainvil aser jala na chioka liasü. Yaküm July 27 nü prangpong amer telok kati tena apuba sülen ita ka tsüngda tenaprong chioka liasü.

Philippines nung anentsüh lendong nung Khristan ter asü



Philippines nung anentsüh lendong atalokba tesem noksa nung angur.

January 27, 2024: Philippines nung tanur pongu densema Khristan ter ki ka nung adenshia tekülem sentong tagidak mapang nung anentsüh lendong nung süogo.

Ketdangsertemi ashiba agi, anentsüh agi ki anenbangba lendong nung asür Khristantem ket nungji sarasadem leniba kakettem amer liasü.

Davao de Oro province kübok Monkayo jila nung iba lendong atalokba sülen iba lendong nung samartem tang

tashi bushidar.

Sorkar ketdangser, Ednar Dayanghirang-i, "Khristantemji ki ka nung adenshia sarasademba mapang nung anentsüh agi iba kiji anenbang. Iba ya tejashitsü osang ka lir, ajisüaka atangji," ta metetdaksü.

Anogo aika maneni tzunglu aruba ajanga ali nemzüka aliba yimtsüngtem nung tzü metsüngbangogo aser Davao de Oro province densema province pezü nung nisung 36,000-i pei ki toktsür aienshiogo, ta civil

defence ketdangsertemi metetdaksü.

Tesem kar nungbo Hokolbar nungi tsüngsang tajungba kümogo. Küm shia Philippines nung yipru mopung lendong 20 ben shi ataloker; talisa June ita nungi tenzüka tzungluruwa mongpu nung item lendong kanga bulua ataloker.

2013 küm 'Haiyan' ta ajaba yipru mopung tesashi ajanga Philippines nung nisung 7,300 dak tema asü aser nisung million 5 shi jenshia liasü.

AO OSHI ANGAZÜKDAK: TANÜ ANGAZÜKTSÜBA OJANG



Shisaluyimer

(n) shisatsü bushir nisung (student)

* Shisaluyimer ajaki mapa inyak angazüktsüla.

Shisamolü

(n) shisa lemsatepba (intellectual discourse)

* Lokti nung shisamolü mapang agiba agi telemtetba tajung agir.

OLONG PAITEP # 6680

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S _ _ _ _
- 13. Yagi ajak ashioxtür
- 15. Ki aokba oset
- 17. Ak shi nung inokba tasen
- 18. Ishika

LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. _ _ _ hi
- 16. Akümüli nungi pilar

OLONG PAITEP # 6679 TELANGZÜBA

TIPIEN

- 1. Asüküm, 5. Lokti, 7. Ola,
- 9. Osang, 10. Dia, 13. Atongpu,
- 14. Apu, 16. Zünga, 17. Ajunga

LANGTSÜNGLEN

- 2. Shilangtsü, 3. Küm, 4. Noksa
- 6. Tongmelang, 8. Ngd, 11. Ulu
- 12. Anogo, 15. Tou

NAI-A YA METETTER MA



Taylor Swift superfan Bilal Ilyes Jhandir-i minute ka tsünga kenjang nungi Taylor Swift ken teintiba shitetba atema alina otsü tasen ka yangluogo. Pakistan nungi arishi küm 20 tain Bilal-i 2019 küm Dan Simpson (UK) ajanga yangluteta aliba otsü ajatet. Iba mapang Dan-i minute ka tsünga ken 27 shiteta liasü saka Bilal-i ken 34 shiteta otsü tasenyanglu.

Tesübanunga Bilal Ilyes Jhandir-i minute ka tsünga shiruru ola teintiba (23) angazük aser an minute ka tsünga Justin Bieber ken teintiba shitetba (29) otsü tasenyanglu lir.



Rashtriya Swayamsevak Sangh (RSS)-i Hokolbarnü (January 26) Dibrugarh district nung "Path Sanchalan" ayonga agiba angur. Jalan Nagar school field, Dibrugarh nung ayonga agiba sentong nung RSS Swayamsevaks 300 tema aden. "Path Sanchalan" ya Dibrugarh nung Maijan road ajanga süi aser iba sentong ya nübortsü tsünga telongjem, adianu tangatetba aser linük meimtsü osang prokshitsü atema ayongzuka agi.

Taoba Youth Congress president Angkita Dutta-i BJP adentsü

Guwahati, January 27, 2024

(Agencies): Assam Youth Congress nung taoba president Angkita Dutta-i January 28, 2024 nü Bharatiya Janata Party (BJP) nung adentsü osang angazük.

Angkita den külemi tongtipang lennir aseme Deobarnü BJP nung adentsü. Parnok ya Khumtai constituency nungi taoba Congress MLA Bismita Gogoi, All Assam Student Union (AASU) taoba president Dipanka Nath aser AASU taoba vice-president Prakash

Das nunger lir. Osang angazükba agi taoba Congress lennir Apurba Kumar Bhattacharjee-i January 29 nü Asom Gana Parishad (AGP) nung adentsü.

Angkita Dutta-i BJP nung adentsüba ya nisung aika jembia liasü kechiyong Congress MP Rahul Gandhi-i Assam nung Bharat Jodo Nyay Yatra agidang la nem mapang magütsü.

January 18 nü Angkita-i Rahul Gandhi den ajurutepa temeten meshitsü asüngdang saka pai mapang magütsü. Lai memorandum ka

agütsütsü aser party nung tanaben anioktsü atema merang saka Rahul'er convoy maneni dang süi. Iba ajanga Congress telok sasep nung ken o temi mangadanga onük adoka jembitsü tenzük.

Indian Youth Congress president Srinivas B. V-i la dak tim mesüi kongshi ta Angkita Dutta-i tai tongloksüba sülen la Congress primary membership nungi küm 6 atema züngdok.

La party nungi anenjaka Rahul Gandhi'er yatra ajanga la nem temeten agütsütsü teimla liasü.

Sikkim nung CAP-i Minister Chief candidate metetdaksü

Gangtok, January 27, 2024

(Agencies): Sikkim nung Citizen Action Party (CAP) indang Foundation Day tanabuba amongdang parnok indang Chief Minister candidate metetdaksüogo.

CAP-i parnok lennir Ganesh Kumar Rai Chief Minister candidate asütsü ashi.

2024 elections nung CAP ruling Sikkim Krantikari Party (SKM) den tokteptsü renemer aser iba

atema CM candidate sangoktsüba ya kanga tongtipang lir.

Ganesh Rai-i aniba CAP ya January 2023 nung tenzük aser parnoki temelenshi tajung den Sikkim nung alirtem tebilemstü asoshi inyaktü tenangzükba lir.

Yashi küm 2 abensaba benjongmong nung Rai-i SKM aija jemi. SKM-i ochimashi inyaker aser public tenzüktsü melena par lennirtem ajangzüktsü asoshi dang inyaker

ta Rai-i tai tongloksü.

SKM-i election nung nangzükbatem meinyaker aser iba nung State Assembly nung Limboo-Tamang communities atema inyaktü nangzükba dena lir ta Rai-i ashi.

"Onoki nangzükba ama inyaktü aser iba sorkar ama tatemtsütem mashitsü. Joko mapang azüngtsü tenzükogo aser 2024 nung CAP-i sorkar akümtsü" ta paisa ashi.

Golaghat nung shikarir ka apu; güntok tezü ka angu

Golaghat, January 27, 2024

(Agencies): January 26 nü Assam kübok Golaghat district nung police-i shikarir ka puogo.

Iba nisung ya Joggu Pegu ta jangjaogo aser pa ket nungi güntok tezü ka ngutet.

January 21 nü Kaziranga National Park nung güntok tetsü

ka kasetba sülen police-i bushitsü tenzuka liasü.

Güntok tasümgangi Agorotoli Forest Range telongtet nung aliba Maklung forest camp anasa angu.

Osang tejangja kar angazükba sülen Bokakhat kübok Mohuramukh tesem nung Pegu apu aser par ki

tesülen güntok tezü ka ali nung miima rema aliba bushitet.

January 21 nü tepsetba güntok ya tasüngnep routine patrol ajanga angu aser iba osang angashili Assam Forest Department ketdangsurtem tesem tonga oa bushisüngdang tenzuka liasü.



Manipur nung Myanmar den arrtsü anasa aliba Kamjong district nung Myanmar refugees 200 shi ka angati medical treatment agiba den mozütem agütsüogo. Myanmar nunger refugee 200 shi ka Kasom Khullen sub-division nung jenoka lir aser parnok ya yaküm November ita nung Sagaing region aser Chin state nungi jena arurtem lir. Kamjong district nung Myanmar refugees 200 dak alia tebur 130, tetsür 160 aser tanur 110 nem asoshi free medical camps nung General Health Checkups aser Health and Diet Improvement tips den mozütem angati lema agütsüogo.

Donald Trump-i E Jean Carrol nem sen million \$83.3 agütsütsü



E Jean Carrol



Donald Trump

New York, Aenjeti/January 27 (Agencies): 2019 küm Donald Trump US tir inyakba mapang osangkaket züluba nung shilem agir E Jean Carroll maksütsüba atema sen million \$83.3 (£65m) agütsütsüla, ta New York nung obendanger kati telemtetba agiogo.

Iba obendang nung temerenshi ya 'compensatory damages' atema sen million \$18.3 aser 'punitive damages' atema sen million \$65 lir.

Taoba mapang ken o ka jembiba nung 1990s nung Trump-i Carroll maksütsü aser tim masüba mapa inyak ta nguteta liasü.

Pai tang tesüsa obendang agütsüba ya ano maneni benoka jembishitsü nangzük aser iba ken o ya 'witch hunt' lir aser obendang ya tamakitsü lir ta ashi.

Tang tesüsa ken o jembiba nungya obendangeri Carroll nem compensation kwi agütsütsü, ajidang lemtetsüba liasü.

Pai o meshidak jembiba ajanga la tenüing menüksüba aser temulung yirutsüba yong compensation ya agütsür.

Tarutsü nung Trump-i la anema o tamajung mejembidaksütsü mechi 'punitive penalty' ya meshir.

Hokulbar nikongdang iba obendang agütsütsü asoshi tebur tenet aser tetsür anati ghonda ana majung jembia liasü.

Trump ya November ita tir election nung Republican candidate asütsü amai lir aser pa 'felony counts' 91 atema ken o pezü benoka lir.

US puti otsü nung mapa tamajung inyakba atema tir anema ken o benokba pa mezüing lir, saka pai aibelen kecha meinyak ta nokdaker.

"Tetsür ajunga asoshi ibai takok lir, shirkok laodaksür aliba nokdaker, aser tetsür ajemzuka yoktsü meranger asoshi tamakok tulu lir," ta obendang agütsüba sülen Carroll-i ashi.

"Tanü obendang ajanga asen linük nung ozüing ya ajak dak alar ta sayur, takar, nüngtugi aser taoba tirtem daka alener," ta la okatsür Robbie Kaplan-i sangdong ka nung ashi.

Trump-i aibelen mapa meinyak ta shijen ashir mesüra Hokulbarnepa pai Carroll ya kodanga majuru ta ashi.

Saka iba obendang agütsüba sülen pai la anema mejembi saka obendangba ya pa indang social media sapang, Truth Social nung aitsü.

"Ni obendang anaprong magizüker aser ni aser Republican Party dak ranglokba Biden Directed Witch Hunt ajunga jembishitsü," ta pai zülutsü.

"Asen Legal System maziükteti lir aser Political Weapon ama amshir. Parnoki First Amendment Rights ajunga

agiener. IBAI AMERICA MASÜ!"

Taoba küm civil trial nung Trump-i 1990s nung Bergdorf Goodman department store dressing room ka nung magazine columnist Carroll dak tim masüba mapa inyak ta ngutet.

Lai tai tongloksüba ya tiazü ta tenüing menüksüba nunga pa aibelena aliba ngutet aser la dang sen million \$5 agütsütsü totuyuba agütsü.

Hokulbarnepa tembangba ken o ya ano Trump-i 2019 küm tenüing menükja jembiba nung rangloker liasü.

Hokulbarnepa kera court yutsür Trump ya Secret Service security den ao aser obendang agütsüba mapang meliasü.

Trump okatsür Alina Habba dang Judge Kaplan-i ajem-ajema alitsü ashiba sülena pai maneni jembiba mechi tepuokdak ayutsü amokmerenba sülen Trump ya ayazüka ao.

"Na tepuokdak ayutsü mapang atonger. Anungji menang," ta pai Habba dang ashi.

Trump-i iba ken o ya "con job" aser "witch hunt" ka lir ta court nung nemnemba sülen obendangeri pa meindoktsü amokmerena liasü.

Hokulbarnepa ken o tatemlen Carroll atema okatsür kati court dang taoba tiri jembidang la tenüing kanga mejungi menüksütsüogo, ta ashi.

"Iba ken o ya Donald Trump merenshitsü atema lir... Iba ken o ya pa teti atema anendaksütsü asoshi lir," ta lai ashi.

Ken o balala ya US Tir Joe Biden teloki inyakba mapa lir ta Trump-i nenshia ashi.

Republican party nungi White House asoshi tokteptsüpur rongnung Trump ya jenjang tajungba lir, aser November 2024 general election nung pai Biden den tanaben tokteptsü amai lir.

MULUNGNEN O



Aso - February, 1931 - Asü - January 21, 2024

Onoki teti meima aliba obala asür **Olenjungba Pongen** (Mongchen) akumli arishi talang moaja lia arur mapang tetemsü nung iba akumli tembanga Kibubai jar aoba mapang ozü mulung zürep jashi nüktzü aidokja temeimer kwikati nübu, rongsen, shisatsü aser sarasadem agi nungita yaritepogo, nenok ajak dang kanga pelar.

Nenok kija kibong aser lokti shia den tsüngtong arua melemsatetba nemjema bilema ozü mulung taroktiba nungi tepela iba zülü ajanga olen tatsü agi nenok ajak den lemsateper. Asen teyanglur Tsüngremi nenok mapa tajung meyipa moajangma. Nenok temeim mapa teti ozü mulungjang nung lir.

~ Temeim kinungtsü, chirnur, semchisemnur aser kinunger adianutem.

US-i Turkey dang sen billion \$23 jenjang F-16 fighter jet ayoktsü melar



F-16 fighter jet

Washington, Aenjeti/January 27 (Agencies): NATO nung Sweden züngsem kumdaksütsü Turkey-i melaba sülen US sorkari Turkey dang sen billion \$23 jenjang F-16 fighter jets tase 40 ayoktsü melaogo - koba mapang talangka menua liasü.

Iba tezüingzüktep nungya tang aliba Turkish F-16 tejang 79 tajungba kuma yanglushitsü osettem densema lir.

Greece dang sen billion \$8.6 jenjang F-35 fighter 40 ayoktsü melaogo ta US State Department-i Congress dang ashi.

Küm ka dak tali menudaksüba sülen Turkey-i Sweden ya NATO nung züngsem kumdaksütsü mela.

Turkey-i jets alitsü atema 2021 küm mezüing asüingdang, saka NATO nung Sweden züngsem kumdaksütsü memulungba mechi tetsükdaksü tulu ajurua liasü. Sweden-i Kurdish separatists tem yarir ta Turkey-i temulung malemba mechi NATO züngsem kumdaksütsü memulungi liasü.

Ajisüaka tan hopta Turkey MP temi NATO nung Sweden züngsem akumtsü mulung aser Turkey Tir Tayyip Erdogan-ia meyongnem agütsüogo.

Iba sülen US Tir Joe Biden-i memonui F-16 ayoktsü asoshi

melatsü ajungshia liasü. 2022 küm February ita nungi tenzüka Russia-i tashi ajak amshia Ukraine amakba ajanga Black Sea region nung Turkey ya tongtipang akum.

"Turkey-i F-16 aircrafts alitsü mepishiba ama ni melaba ya NATO nung Sweden züngsem akumtsü Turkey-i mulungba ajanga lir," ta Democratic Senator Ben Cardin-i ashi, shiba Senate Foreign Relations Committee mendenpuba lir. Nok-nü ayoktsü asoshi tongtipang committee pezüi temelaba agütsütsü nüngdaker aser item rongnung Senate Foreign Relations Committee ya ka lir.

"Saka aibelen tesü: Iba telemtetba ya ni pongba-pongba agiba masü."

Turkey indang human rights record tajungba akumtsü nüngdaker aser tashi ajak amshia Ukraine amakba atema Russia aitsütsü mapa tali inyaksüla.

NATO nung Sweden züngsem kumdaksütsü asoshi temelaba agütsütsü Hungary dang anünga lir, aser tawa terenlok aliba angur.

Taoba küm Denmark aser Netherlands nungi America-i yangluba F-16 fighter jets tem Ukraine nem agütsütsü mela liasü.



Gaza Strip nung Palestine nunger bhukuma aser Yemen yimtiba Sanaa tezülen US-i amakba anema rally ka agidang Houthi züngsemtema jajaba noksa nung angur. Yemen nung aliba Houthi telungpuri Gulf of Aden nung senzua aliba US warship ka dak Hokulbarnepa missile ka khaloktsü saka US sepaitemi khazüka yok saka British nunger rong ka nung kongshi. Houthi telungpuri Hokulbar aonunga shishilempaba rong ka nung missile khalokja rongdoktsü.

Grand Slam Champion tambosang Rohan Bopanna kumogo



Hokulbarnü India nunger Rohan Bopanna aser Australia nunger Matthew Ebden nati 2024 Australian Open tebur tarep final nung Italy nunger Simone Bolelli aser Andrea Vavassori na madak takok ngur pelatepba noksa nung angur.

Melbourne, Aenjeti/January 27 (Agencies): Honibarnü Rod Laver Arena nung Australian Open nung Italy nunger Simone Bolelli aser Andrea Vavassori madak takok anguba sülen arishi küm 43 tain Rohan Bopanna ya Grand Slam akoker tambosang kumogo.

Indo-Australian tarep Bopanna aser Matthew Ebden nati Italy nunger tebur tarep tennis asayar anema tongpang nung nokdak aser ghonda ka ser minute 39 asayaba sülen 7-6, 7-5 agi takok ngua liasü.

Ibai tena asoshi team ka ama mezüngbuba takok anguba alitsü aser Bopanna asoshi tebur tarep tennis asayamung taoba Grand Slams 60 nung asayar tang mezüngbuba champion

alitsü. Arishi küm 43 tain Bopanna yagi Dutch nunger Jean-Julien Rojer ajateter, shibai arishi küm 40 nung lia Marcelo Arevola den külemi French Open tebur tarep asaya koka liasü.

Bopanna ya tebur tarep puti itsü nung number one tambotising akumtsü aser iba ranking ya taruba hopta sayatsü.

Australia nung iba asayamung takok anguba ya Bopanna asoshi Grand Slam tanabuba alitsü. Pai taoba Grand Slam akokba ya Canada tsür Gabriela Dabrowski den külemi 2017 French Open tarep temeyoktep asaya nung liasü.

Iba takok ya Ebden asoshi tebur tarep tanaben akoker

alitsü, shibai külem Australia nunger Max Purcell den külemi 2022 küm Wimbledon koka liasü.

Honibarnü final nung Bopanna-Ebden nati set mezüngbuba indang hame mezüngbuba ya straight serves nung koka liasü. Iba sülen Italy nunger Bolelli-Vavassori nati asendenshir yimya balaka nung asaya tenzük.

Iba sülen asayayonga aoba 6-6 nung lia Bopanna aser Ebden nati straight points 7 ngua minute 51 asaya set mezüngbuba agia liasü.

Tanabuba set nunga anatsülen nungi kanga meranga asayar 5-5 nung tie liasü, saka iba set ya mezüng set den kasa yimya nung takok angu.

Chargers FC-i LLZ 11th Open Futsal Tournament kokogo



Lensar Zünga, Longsa-i ayongzükba 11 buba Open Futsal Tournament shibangba sentong nung tetushi tesemdanger den takokertem aser tayongertem külemi tangokba noksa nung angur. Mokokchung, 27th January, 2024

Mokokchung, 27th Jan (TYO): Lensar Zünga, Longsa-i ayongzükba 11 buba Open Futsal Tournament Jan 26 & 27, 2024 anogo ananü Longsa Volleyball Ground nung asayaa mungogo aser taküm iba asayamung Chargers FC-i benogo.

Tanü tesüsabuba asaya Chargers FC o Amigos na asayaba telok anapronglai goal

2-2 agüja iba asaya kasasa nung tembang, anungji, penalty asayaba metsütep dang Chargers FC-i goal 3-2 agi Amigos madak takok tulu ngua liasü.

Takoker nem senpet sen 30,000/- aser atongdakba nem 20,000/- senpetsütsü. Iba den nija senpet – Highest Goal Scorer Amigos nungi Imnatoshi-i agizük, Best Goalkeeper

senpet Chargers FC nungi Imkongtensä aser Player of the Tournament senpet Amigos nungi Lungpetsing Thou-i agizük.

Iba asayamung nung PS to Advisor Minority Affairs & Sericulture Govt. of Nagaland, Tiaonen Jamir-i meraketa tenzüksü aser Dr. Tialiba Longkumer-i tobur junga shibangtsü.

Jurgen Klopp-i ulura inyaktetogo: Mauricio Pochettino

London, Aenjeti/January 27 (Agencies): Liverpool coach Jurgen Klopp-i mapa nungi anena football nungi pila alitsü telemteba agiba alima nung football asayartemi mamangteter. Ajisüaka asyartem aser pa den toktepba coach temia pa meimba, akumtsüpoba aser pa dak saklokba maneni jembir.

Chelsea coach Mauricio Pochettino-ia social media nung Germany nungba nem tenüngsang agüja liasü.

Klopp-i iba telemteba agiba osang angashili ni süngmang saka pai Liverpool asoshi tajungtiba nung inyakogo aser pai saisapong nungi pila alitsü langa lir, ta Pochettino-i ashi.

"Ni kanga aoksa. Tanü ni mapa inyaka lia osang angashi. Ibai tejashitsüka liasü. Onoki tang nungi pa menungrar," ta

Pochettino-i ashi.

"Ni Tottenham nungi anentsü dang pa nungi mezüngbuba message aru. Pai Liverpool den inyakba mapa ya tesüngmangtsüka. Pai anisüngzükner. Pai aji langa lir, saka football meimer asoshi tejashitsü. Pa dak yimya tajung lir aser Liverpool aser English football-i pa menungratsü."

Pa aruli onok (Tottenham Hotspur) den mezüng asaya. Iba mapang 0-0 nung tembang. Pai inyakteta yutsüba ya ulura. Ni pa aser par coaching staff nem tenüngsang agütsür. Tang nungi tenzüka season matem tashi pa tenüng asangtsü pa dak langa lir, ta Pochettino-i ashi.

Liverpool nung küm ti ser tesadang lir Brehostibarnü Klopp-i telemteba agiba osang ya sangdonga liasü.

Aryna Sabalenka-i 2024 Australian Open takok marok agizükogo



Aryna Sabalenka

Melbourne, Aenjeti/January 27 (Agencies): Belarus tsür arishi küm 25 tain Aryna Sabalenka-i Qinwen Zheng madak takok ngua Australian Open takok marok tanaben ashia ajungketogo.

Ghonda ka ser minute 16 asayaba nung Sabalenka-i Zheng madak 6-3, 6-2 agi ayong ayonga akok.

Melbourne Park nung tetsür kija tennis asayamung tanaben ashitena akokba rongnung 2013 küm Victoria Azarenka sülenbo Sabalenka akumer.

"Hopta ana shi ni jangratema asaya arur. Ni iba trophy ano maneni ajungkettsü imlaa meliasü aser ni mamangteter. Ni o mejembiteter," ta Sabalenka-i asaya temer ashi.

Sabalenka-i Zhen dang pelaba o kar ashi aser ajungshia liasü.

"Na tang kechi bilemer nia meteta lir - final nung tamakok angutsü ya tasak, saka na asayar tajung aser ano tanur lir. Na finals aika nung asayatsü aser nai takok angutsü," ta lai ashi.

Sabalenka-i mezüng set amokbanger asaya tenzüka games asem ayong-ayonga

asaya 3-0 liasü. Arishi küm 21 tain Zheng-ia meyiper kanga meranga asaya, saka asayar tejen Sabalenka-i kanga süngjema minute 33 nung mezüng set ya 6-3 agi akok.

Tanabuba set nunga Sabalenka-i amokbanger asayateta mezüngbuba games ana ayong-ayonga akok. Zheng-ia points kar angu, saka Sabalenka-i games asem tanen makai akok.

Iba asayamung round tasembuba nung top seed Iga Swiatek madak takok anguba sülen Sabalenka-i iba asayamung akoktsü ta aikati imla liasü, shibai külem linük nungisa Azarenka madak ghonda ka shi nung takok ngua liasü.

Küm ter jakdang China tsür Li Na-i 2014 Australian Open asayamung koka linük nem tepela bener arutsü aser iba mapang arishi küm 11 tain Zheng ya lar medemtsürtem den külemi television nung iba asaya repranga liasü.

China nunger aika aliba yimti nung terepranger nisung 15,000 nungya Zheng bhukumer timba liasü, saka paroki aginüba am alai takok magütsütet.

BILEMDANGANG

"Pei sasa pei mangatetba ajanga aika tim atemer."